

28/05/2003

Aspirasi pakej rangsangan wajar dihayati

Datuk Salleh Majid

SALAH satu sasaran utama Pakej Strategi Baru yang mengandungi 90 langkah bernilai RM7.3 bilion yang diumumkan Perdana Menteri, Datuk Seri Dr Mahathir Mohamad pada 21 Mei lalu ialah Perusahaan Kecil dan Sederhana (PKS).

Beberapa langkah penting akan dilaksanakan oleh beberapa institusi kewangan seperti Bank Pertanian Malaysia (BPM) dan Bank Simpanan Nasional (BSN). Masing-masing, sebanyak RM500 juta dan RM300 juta diletakkan dalam BPM dan BSN untuk program Kredit Mikro.

Saya tertarik dengan ungkapan terhadap gesaan berkali-kali kerajaan kepada institusi kewangan supaya "bukan hanya menyediakan jendela PKS pada nama saja, tetapi jendela yang diwujudkan itu benar-benar mempraktikkan amalan pemberian pinjaman yang mudah, fleksibel dan yang terpenting dapat dinikmati oleh peminjam. Institusi kewangan kini digesa mempraktikkan sepenuhnya client charter sebagai jaminan bahawa mereka adalah komited kepada aspirasi dan usaha kerajaan membangunkan PKS."

Melalui ungkapan ini, kita tahu ada institusi kewangan yang hanya melepaskan batuk di tangga dalam membantu usahawan PKS, sedangkan Perdana Menteri sendiri pun tidak diendahkan.

Bank Negara Malaysia (BNM) terpaksa mengambil tindakan lebih berkesan ke atas mereka yang bersikap demikian. Saya sendiri menerima surat rintihan dan aduan pengusaha yang mengalami masalah mendapatkan pinjaman.

Ada juga baiknya kalau mereka yang menghadapi masalah ada tempat mengadu di badan yang berkuasa untuk melakukan sesuatu seperti BNM.

Aduan boleh disiasat dan kalau didapati sah, tindakan diambil. Kalau diada-adakan, pemohon patut disenaraihitamkan. Dengan cara ini, cadangan perniagaan yang berdaya maju tidak akan disia-siakan.

Adalah tidak munasabah bagi pegawai bank yang diberikan tanggungjawab menilai sesuatu cadangan, mengetahui semua idea baru. Ada baiknya satu panel membuat keputusan dan bukan hanya seorang pegawai diserahkan tanggungjawab itu. Kalau kita perhatikan peruntukan dan kelonggaran yang diberikan kerajaan dalam Skim Kredit Mikro, kita patut nampak pentingnya sumbangan PKS ke arah pembangunan negara. Malahan untuk Tabung Untuk Makanan, RM1 bilion diperuntukkan.

Pakej rangsangan ekonomi ini membuka banyak peluang kepada usahawan. Daripada bidang pertanian kepada bidang pembuatan, bidang pembinaan kepada bidang latihan, teknologi maklumat dan komunikasi kepada bioteknologi, dan bidang pendidikan kepada kesihatan. Semuanya ada peruntukan. Terpulanglah kepada yang gigih merebut peluang itu.

Tersirat dalam pakej rangsangan ini ialah perlunya penjanaaan pertumbuhan ekonomi melalui penggunaan tempatan, rakyat sendiri berbelanja dalam negeri.

Bonus dan pengurangan caruman kepada Kumpulan Wang Simpanan Pekerja akan menambahkan jumlah wang untuk berbelanja supaya kegiatan ekonomi terus rancak.

Penyakit Sindrom Pernafasan Yang Teruk (SARS) mendatangkan kesan kepada dunia, bukan negara kita saja. Eloklah mereka yang menyebabkan penyakit ini sedar yang alam ini ada hukumnya dan yang melanggar akan menerima bala.

Kejayaan Pakej Rangsangan ini bergantung atas tindak balas usahawan dan sektor swasta. Walaupun dilaporkan kerajaan akan hilang RM800 juta pendapatan, nelayan akan dapat menggunakan 1,000 bot moden untuk menambahkan hasil, rumah murah akan ditambahkan, industri pelancongan akan menerima kemudahan jaminan istimewa serta usahawan kecil dan sederhana tidak perlukan cagaran untuk meminjam. Begitu luas golongan yang beruntung, tidak ada sebab pakej ini tidak akan mendatangkan hasil yang diinginkan.

Harapan kita institusi kewangan yang diberi tugas untuk membantu golongan yang bakal menjana ekonomi negara menghayati aspirasi sebenar keseluruhan pakej rangsangan ini dan tidak dibelenggu birokrasi yang bakal membantutkan usaha untuk berkembang.

Di pihak usahawan juga terletak tanggungjawab yang penting demi kesejahteraan negara serta wajar bersikap bersemangat dan berkeyakinan diri.

Sesiapa boleh menyiapkan aliran wang tunai tetapi aliran wang tunai yang tidak realistik tidak ada gunanya. Segala andaian yang digunakan terutama mengenai potensi pasaran harus berasaskan penyelidikan.